

**Bil. 48**

**Khamis**

**7 November 2019**



**MALAYSIA**

# **PENYATA RASMI PARLIMEN**

*Parliamentary Debates*

## **KAMAR KHAS**

*Special Chamber*

**PARLIMEN KEEMPAT BELAS  
PENGAL KEDUA  
MESYUARAT KETIGA**

## KANDUNGAN

### UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Pengiraan Saham Ekuiti Bumiputera Menghala ke  
Wawasan Kemakmuran Bersama 2030**  
- *YB. Tuan Chan Ming Kai (Alor Setar)* [Halaman 1]
- **Bekalan Air Mentah untuk Melaka**  
- *YB. Tuan Khoo Poay Tiong (Kota Melaka)* [Halaman 5]

**MALAYSIA  
KAMAR KHAS  
PARLIMEN KEEMPAT BELAS  
PENGKAL KEDUA  
MESYUARAT KETIGA**

**Khamis, 7 November 2019**

**Mesyuarat dimulakan pada pukul 2.30 petang**

**DOA**

*[Timbalan Yang di-Pertua (Tuan Nga Kor Ming)  
mempengerusikan Mesyuarat]*

---

**UCAPAN DI BAWAH USUL  
BERKENAAN PERKARA TADBIR KERAJAAN (P.M. 17)**

**Pengiraan Saham Ekuiti Bumiputera Menghala ke  
Wawasan Kemakmuran Bersama 2030**

**2.34 ptg.**

**Tuan Chan Ming Kai [Alor Setar]:** Terima kasih. Tuan Yang di-Pertua dan Yang Berhormat Menteri Hal Ehwal Ekonomi, saya ingin menarik perhatian pihak kementerian ke atas laporan terkini dalam Wawasan Kemakmuran Bersama 2030 yang mendedahkan bahawa pemilikan ekuiti bumiputera daripada 23 peratus pada tahun 2011 merosot kepada 16.2 peratus pada tahun 2015.

Sejak pelaksanaan DEB pada zaman 70-an, adalah jelas hala tuju kerajaan berhasrat untuk meningkatkan pemilikan ekuiti oleh bumiputera. Akan tetapi adalah kurang jelas dari segi formula pengiraan dan kriteria elemen yang diambil kira dalam ukuran ini. Tanpa pecahan dan pengiraan yang jelas adalah susah untuk mengenal pasti kegagalan dasar sebelum ini dan seterusnya menyusun strategi untuk pencapaian statistik yang diharapkan.

Maka, minta Menteri menjelaskan bagaimana dan formula pengiraan nilai dan kuantiti ekuiti tersebut termasuk penjelasan beberapa isu berikut:

- (i) definisi bumiputera dalam statistik sama ada diambil kira bumiputera Orang Asli dan Muslim bukan Melayu;
- (ii) apakah definisi milikan sama ada hanya etnik pemilik ekuiti dikira atau mengambil kira purata atas jumlah populasi kaum tertentu;

- (iii) adakah saham ekuiti yang dimiliki oleh bumiputera di luar Malaysia diambil kira;
- (iv) adakah saham ekuiti yang dimiliki secara tidak langsung melalui syarikat subsidiari bukan bumiputera diambil kira;
- (v) apakah jenis saham ekuiti yang diambil kira contohnya syarikat sendirian berhad, *enterprise*, GLC, perniagaan tunggal, amanah saham, yayasan Islam, lembaga, koperasi dan lain-lain;
- (vi) adakah nilai projek kerajaan yang diberikan kepada syarikat diambil kira tanpa kira untung rugi syarikat; dan
- (vii) adakah saham ekuiti milikan bumiputera yang telah jual kepada bukan bumiputera diambil kira secara berkumpul (*accumulate*) atau ditolak dari jumlah milikan semasa.

Mohon Menteri menjelaskan juga punca kemerosotan milikan ekuiti bumiputera dan apakah cadangan pihak kementerian dalam mencapai hasrat milikan ekuiti 30 peratus tanpa mengurangkan peluang dan menyekat pembangunan golongan bukan bumiputera. Sekian, terima kasih.

#### **2.36 ptg.**

**Timbalan Menteri Hal Ehwal Ekonomi [Dr. Mohd Radzi bin Md Jidin]:** Tuan Yang di-Pertua, untuk makluman Ahli Yang Berhormat, pengiraan ekuiti sektor korporat yang dilaporkan dalam dokumen Wawasan Kemakmuran Bersama adalah nilai pemilikan saham dalam sesebuah syarikat yang didaftarkan di Suruhanjaya Syarikat Malaysia (SSM) dan syarikat yang disenaraikan di Bursa Malaysia.

Kaedah pengiraan ekuiti yang dilaporkan adalah berdasarkan pegangan modal saham syarikat pada nilai tara atau dengan izin *par value* sebagaimana dalam Laporan Tahunan Syarikat yang diserahkan kepada SSM. Formula pengiraan adalah berdasarkan jumlah unit saham syarikat didarabkan dengan nilai tara.

Untuk makluman Ahli Yang Berhormat, penjelasan berhubung beberapa isu yang dibangkitkan adalah seperti berikut. Saya akan jawab satu persatu iaitu:

- (i) Orang Asli diambil kira dalam definisi bumiputera bagi pengiraan ini manakala faktor agama tidak diambil kira dalam pengklasifikasian pengiraan ekuiti ini;

- (ii) Pengiraan ekuiti sektor korporat adalah nilai pegangan saham sesebuah syarikat mengikut etnik yang didaftarkan di SSM dan disenaraikan di Bursa Malaysia;
- (iii) Pengiraan ekuiti tidak mengambil kira jumlah atau nilai saham yang dimiliki oleh bumiputera di luar Malaysia. Pengiraan pemilikan ekuiti sektor korporat ini adalah bagi menganggar hak milik saham syarikat di Malaysia berdasarkan sumber yang diperolehi daripada SSM dan Bursa Malaysia sahaja;
- (iv) Setiap pemilikan saham sama ada oleh bumiputera atau bukan bumiputera dalam mana-mana syarikat yang didaftarkan di SSM dan syarikat yang disenaraikan di Bursa Malaysia akan diambil kira dalam pengiraan ekuiti ini;
- (v) Selain daripada pegangan ekuiti individu, pemilikan oleh agensi amanah bumiputera dan institusi berkepentingan bumiputera turut diambil kira dalam pengiraan ekuiti ini seperti Permodalan Nasional Berhad (PNB), Perbadanan Usahawan Nasional Berhad (PUNB), Lembaga Tabung Haji dan lain-lain;
- (vi) Pengiraan ekuiti hanya melihat kepada pemilikan ekuiti mengikut etnik dalam sesebuah syarikat dan tidak mengambil kira kedudukan kewangan syarikat tersebut;
- (vii) Pengiraan ekuiti ini tidak melihat kepada transaksi pembelian atau penjualan saham oleh bumiputera dan bukan bumiputera. Pengiraan ini adalah berdasarkan maklumat pegangan saham sesebuah syarikat pada akhir tahun kewangan melalui penyata tahunan yang diserahkan simpan di SSM.

Untuk makluman Ahli Yang Berhormat, berdasarkan analisis awal, antara faktor kemerosotan milikan ekuiti bumiputera yang telah dikenal pasti adalah pelaksanaan Dasar Liberalisasi Ekonomi dan pemansuhan Jawatankuasa Pelaburan Asing (FIC) yang menyumbang kepada peningkatan pemilikan ekuiti asing.

Dalam Wawasan Kemakmuran Bersama (WKB), kerajaan telah menekankan tiga objektif utama. Objektif pertama adalah memfokuskan kepada pertumbuhan ekonomi negara. Kerajaan yakin dengan penstrukturan semula ekonomi negara ke arah yang lebih progresif dan berpaksikan ilmu dan bernilai tinggi, semua rakyat Malaysia tanpa mengira etnik akan dapat merasai nikmat pertumbuhan ekonomi.

Objektif kedua, menumpukan kepada usaha untuk merapatkan jurang ekonomi di antara kumpulan pendapatan, wilayah, rangkaian bekalan dan etnik. Bagi menangani jurang ekonomi antara kumpulan pendapatan, kerajaan yakin tumpuan kepada aktiviti ekonomi bernilai tinggi dan perwujudan pekerjaan berpendapatan tinggi akan menyumbang kepada usaha untuk merapatkan jurang ekonomi di antara kumpulan ini. Selain daripada itu, Teras Strategik 5 WKB iaitu Kesejahteraan Sosial memberi penekanan kepada kebajikan semua kelompok masyarakat terutamanya golongan rentan ekonomi dan kumpulan isi rumah B40 tanpa meminggirkan mana-mana kumpulan etnik.

#### ■1440

Dalam merapatkan jurang ekonomi antara wilayah, kerajaan komited agar pembangunan dilakukan secara saksama dan inklusif bagi memastikan pembangunan ekonomi tidak tertumpu di kawasan tertentu sahaja. Dalam hubungan ini, pemetaan kawasan titik tumpuan ekonomi (*economic hotspots*) dengan izin, akan dilaksanakan bagi mengenal pasti kawasan luar bandar yang berpotensi sebagai pusat ekonomi yang mampan. Usaha untuk merapatkan jurang antara wilayah akan memberi manfaat kepada semua rakyat yang tinggal di wilayah tersebut.

Dari segi rangkaian bekalan, data menunjukkan masih terdapat jurang yang lebar dalam pelbagai lapisan rangkaian bekalan. Sebagai contoh, Kajian Pasaran Sektor Makanan yang dijalankan oleh Suruhanjaya Persaingan Malaysia (MyCC) berkaitan pemasaran ikan mendapati pemborong utama menaikkan harga sehingga enam kali dalam rangkaian pemasaran ikan tempatan dengan mengambil keuntungan antara 60 peratus hingga 75 peratus di setiap rangkaian bekalan.

Dalam rangkaian ini, nelayan merupakan kumpulan yang paling sedikit mendapat keuntungan. Perkara ini tidak setimpal dengan titik peluh nelayan yang bekerja keras untuk mencari rezeki. Sehubungan itu, kerajaan akan memastikan penyertaan yang lebih adil dalam rangkaian bekalan.

Usaha untuk menangani ketiga-tiga jurang ini melibatkan rakyat secara keseluruhannya tanpa mengira kumpulan etnik. Namun begitu, kerajaan sedar masih wujud ketidakseimbangan pendapatan dan jurang kekayaan yang nyata dan semakin melebar antara kumpulan etnik. Jurang ini jika tidak ditangani dengan baik akan mewujudkan keadaan tidak harmoni dalam negara.

Antara penekanan utama WKB adalah kepada keberhasilan pencapaian berdasarkan prinsip kesaksamaan keberhasilan (*equitability of outcomes*) dengan izin. Kalau dahulu, kerajaan memberi fokus kepada peningkatan bilangan peluang berdasarkan prinsip kesaksamaan peluang (*equitability of opportunities*) dengan izin, terutama dalam bidang ekonomi dan pendidikan, kini aspek keberhasilan pencapaian berdasarkan prinsip kesaksamaan keberhasilan kepada etnik yang ketinggalan akan diberikan penekanan utama.

Peluang akan diberikan kepada yang berkeelayakan dan mempunyai kemampuan. Bagi yang masih belum layak dan mampu pula, bantuan latihan serta sokongan sewajarnya akan diberikan bagi meningkatkan peluang kejayaan mereka. Oleh itu, penting untuk kita fahami bahawa Wawasan Kemakmuran Bersama adalah satu agenda nasional bagi memastikan Malaysia dapat dibentuk sebagai sebuah negara yang bersatu, makmur dan bernaung seterusnya muncul sebagai paksi ekonomi serantau. Sekian, terima kasih.

### **Bekalan Air Mentah untuk Melaka**

**2.40 ptg.**

**Tuan Khoo Poay Tiong [Kota Melaka]:** Tuan Yang di-Pertua, tajuk ucapan saya ialah bekalan air mentah untuk Melaka.

Tuan Yang di-Pertua, baru-baru ini negeri Melaka telah mengalami gangguan bekalan air dan tekanan air yang rendah. Pihak Syarikat Air Melaka Berhad (SAMB) telah menyatakan bahawa masalah ini berpunca daripada fenomena musim panas dan purata hujan yang rendah. Akibatnya, lebih kurang 19 kawasan di Melaka telah terkesan.

Saya membawa isu ini ke perhatian kementerian kerana bekalan air merupakan perkara yang sangat penting. Dari segi ini, pihak kerajaan dan SAMB harus memastikan terdapatnya perancangan jangka masa panjang untuk memastikan bekalan air mentah di Melaka adalah mencukupi.

Saya juga mengambil maklum bahawa SAMB telah menjalankan penilaian awal dan mengemukakan beberapa cadangan untuk meningkatkan bekalan air mentah untuk Melaka. Oleh kerana projek-projek tersebut memerlukan peruntukan pembangunan yang agak besar, maka saya membawa perkara ini kepada pihak kementerian untuk mendapatkan respons terhadap perkara ini. Rakyat Melaka berharap supaya langkah-langkah awal dapat diambil dan untuk mengelakkan gangguan bekalan air yang lebih serius berlaku pada masa hadapan. Sekian, terima kasih.

**2.45 ptg.**

**Timbalan Menteri Air, Tanah dan Sumber Asli [Tengku Zulpuri Shah bin Raja Puji]:** *Assalamualaikum warahmatullahi wabarakatuh.* Salam sejahtera dan terima kasih Tuan Yang di-Pertua dan terima kasih sahabat saya Yang Berhormat Kota Melaka.

Kementerian sedia maklum dan prihatin di atas masalah bekalan air yang membelenggu rakyat negeri Melaka. Dari penelitian kementerian, masalah ini disebabkan oleh faktor kekurangan sumber air. Kerajaan Persekutuan telah meluluskan dua projek sumber air di Melaka iaitu Projek *Off River Storage* Melaka berkapasiti 310 juta liter sehari dengan peruntukan sebanyak RM350 juta dan Projek Pembinaan Empangan Jernih berkapasiti 14 juta meter padu dengan peruntukan sebanyak RM164 juta. Kedua-dua projek ini akan siap pada tahun 2023 dan mampu menampung permintaan bekalan air Melaka masing-masing sehingga tahun 2040 dan tahun 2052.

Dalam pada itu, perbincangan antara kementerian dan Kerajaan Negeri Melaka bagi memperincikan cadangan enam projek sumber air di Melaka telah diadakan pada 3 Oktober 2019. Walau bagaimanapun, adalah penting supaya kesemua cadangan projek ini diperhalusi agar objektif utama pembinaannya dapat dicapai. Sehubungan itu, penilaian atau kajian kemungkinan perlu dilaksanakan terlebih dahulu bagi memastikan keberkesanan projek tersebut. Terima kasih.

**Timbalan Yang di-Pertua [Tuan Nga Kor Ming]:** Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Isnin 11 November 2019.

***[Kamar Khas ditangguhkan pada pukul 2.47 petang]***